

1615

47-2035

1

7^e. Can 17 12 336

*DISCOVRS DE CE QVI S'EST
passé en la presentation des Remonstrances par
écrit, que le Parlement alla faire en Corps au
Roy, le Mardy 22. May mil six cens quinze.*

LA Cour informée de la volonté & commodi-
té du Roy, pour ouïr ses tres-humbles Remon-
strances, arriua au Louvre sur les trois heures de
releuée, où il y auoit vne multitude de peuple cu-
rieux de voir ceste action, elle fut conduite au
Cabinet destiné pour reposer les Ambassadeurs,
attendant leur Audiance, où ayans demeuré de-
my-heure, arriua le sieur de Vitry, Capitaine des
gardes du Corps, pour la conduire en la Chambre
du Conseil, où estoient le Roy, & la Roynne: Il pro-
posa (pour éuiter la presse) de mōter par vne mon-
tée secrette, ce que la Cour ne trouua bon, iugeant
qu'il estoit de la bien-seance d'vne telle Compag-
nie de monter par vn grand escallier: doncques
pour en faciliter le chemin, ledit sieur de Vitry se
mist deuant, & luy donna moyen d'entrer en or-
dre en ladite chambre, où estoient avec leurs Ma-
jestez, du costé du Roy, Messieurs de Guyse, de
Neuers, de Ioinuille, & d'Espernon: Du costé de
la Roynne, Messieurs de Vendosme, de Mont-mo-
rancy, de Brissac, de Souvray, le Grand, & autres
Officiers de la Couronne: A costé de la gauche du
Roy estoit Monsieur le Chancelier, ayant sa main
droicte appuyée sur ladite chaire: & au dessous de
luy Monsieur le President Jeannin, & grand nom-
bre de Seigneurs, & Gentils-hommes, Conseillers
d'Estat, & autres: Derriere le Roy & la Roynne e-
stait assis sur vn tabouret le Marechal d'Ancre, &

A

Case

F

39

326

1615 d'ia

proche de la chaire de la Roynne le Commandeur de Sillery, & le sieur de la Chastaigneray : & apres quelque silence, Monsieur le premier President commença à dire, Que le Parlement n'auoit iamais manqué au deuoir & au seruice de son Roy, & protestoit encor' de seruir eternellemēt sa grandeur ; qu'il auoit charge de représenter à sa Maiesté, non les motifs de l'Arrest donné en Mars, mais ses tres humbles submissions & Remonstrances, dans lesquelles se trouuera écrit tout ce qu'il a iugé vtile & necessaire pour son seruice; n'ayant autre desir que de recognoistre sa Majesté pour son souverain Seigneur & vnique Maistre. Et sur ce presenta au Roy les Remonstrances, qui les ayant prises, les bailla au sieur de Lomenie, Secretaire d'Estat; pour ce commanda que l'on se retirast.

Lors ledit premier Presidēt dit, Qu'il estoit chargé de supplier tres-humblement sa Maiesté, qu'elles fussent presentement leuës, la Roynne l'ayant trouué bon. Le fils dudit sieur de Lomenie, par commandement du Roy, les leut fort distinctement, sans interruption; puis sa Maiesté commanda au Parlement de se retirer au grand Cabinet, où il fut enuiron demy-heure ; & eux retournez vers elle, le Roy commença à dire, qu'il auoit entendu leurs Remonstrances, desquelles il n'estoit entierement satisfait; que la Roynne sa mere diroit le reste. Dōcques la Roynne prenāt la parole, dit, que le Roy auoit grāde occasion de s'offēcer de la Compagnie, ayant au preiudice de ses deffences, touché aux affaires de son Estat, voulant faire les reformateurs, disposer du Gouuernement & de ses fināces: que pour sō regard, elle n'estoit si peu clairvoyante, qu'elle ne recogneust que c'estoit sa Re-

gēce que l'on attaquoit, laquelle toutesfois auoit esté loüée par tous les ordres de ce Royaume, assemblez en corps d'Estat, & mesme par leur Compagnie: que l'on ne pouuoit parler de l'administration, sans pouuoir la toucher: que ces Remonstrances n'estoiēt approuuée d'eux tous: qu'il y auoit six Presidens, tant presens qu'absens qui y auoient resisté: que c'estoient seulement six ou sept, tant Presidens que Conseillers, qui en auoient esté les Promoteurs: que le Roy en scauoit les noms & demeures: qui ne l'endureroit à l'aduenir, & les feroit chastier: qu'elle vouloit bien dire tout hault, qu'il n'y auoit iamais eu Regēce plus heureuse que la sienne. Et voulant passer outre, elle s'arresta, disant, que la colere la pressoit de telle sorte, qu'elle ne pouuoit plus parler: & finissant, cōmanda à M. le Chācelier de cōtinuer & faire la réponse du Roy, ce qu'il fit: Il dit, Que la France estoit vne Monarchie, où le Roy seul cōmandoit, tenāt sō royaume souuerainemēt de Dieu, qu'il le deuoit gouverner selon les Loix & Ordonnāces, sans estre tenu d'en rēdre cōpte à aucun: qu'il n'appartiēt au parlement de controoller son Gouuernemēt: que le Parlemēt ne iugeoit de la ligne de Compte, ny des Aides: A plus forte raison ne pouuoit se mesler de la cōduite & direction de l'Estat: que le Roy distribuoit sa puissance cōme il luy plaisoit: que le Parlemēt ne pouuoit entreprēdre plus que le Roy luy promettoit: que de verité les Rois auoiēt accoustumē aux grādes affaires de prēdre advis de leur Parlemēt, & croyoit qu'ils pouuoient grādemēt seruir; mais que c'estoit quand il luy plaisoit: quand leur autorité estoit iointe avec la volōté du Roy, elle estoit trefbōne, & cōseilleroit touiours le Roy d'vser de leurs

Conseils: mais que de le dōner de leur mouuemēt, quād eux-mesmes y auroiēt bien pēsé, ils trouueroiēt ne le-deuoir faire: qu'insēfiblemēt ils s'estoiēt portez à vne deliberation qui alteroit grādemēt l'authorité du Roy: que le temps mesme y estoit fort cōtraire, pour estre celuy auquel on trauaille aux Cahiers des Estats: qu'estās entrez au Parlemēt ils eussent trouué sujet de faire à tēps ce qu'ils font hors de saison, que veritablemēr l'intētion generale estoit bonne; mais qu'au parler il y auoit du mā-quemēt: que s'il a cy-deuāt dit que cela estoit sans raison, il dit maintenāt qu'il est sans exēple, ayant charge expresse de dire l'un & l'autre, d'autāt qu'il ne se trouuera point que le Roy estant à Paris, le Parlement de son propre mouuemēt ait assemblé les Princes, Ducs, Pairs, & Officiers de la Corōne: n'en voulāt autre preuue que les exēples rapportez dās les Remōstr. que pour ce qui se passa du regne de Charles V. ce qui fut par le Roy mesme sur vne requeste presētée par ses anciēs seruiteurs qui estoient en Guyēne, fit appeller le Roy d'Angleterre en sō Parlemēt, faisāt cōdāner les rebelles, & cōfirmer les fideles; mais toutes ces alegatiōs ne peuent s'approprier au sujet de maintenant. Et quant aux traictez de Paix, qu'ils ne se declareroient point au Parlemēt: que l'accord estāt fait & signé du Roy, on faisoit publier la paix à sō de trōpe: que mesmes au dernier traicté fait avec le Roy d'Espagne, auquel il eut l'honneur d'estre employé, apres que les Deputez furent d'accord des Articles, & qu'ils furent signez par le Roy, la paix fut publiée à son de trōpe: & long tēps apres sa Majesté les enuoya au Parlement, pour estre enregistrees: que pour les éuocations dont on se plaignoit, qu'il n'en auoit point

donné sans deliberation de Conseil, & que c'estoit pour empescher que les Parlemēs au preiudice des ordonnances, ne prinssent cognoissance des differens de ceux qui auoient des parens en leur Compagnie. Quāt aux Abolitions, il pouuoit seulemēt asseurer pour l'aduenir, qu'il ne s'en passeroit plus aucune. Le Cōseil estant réglé de sorte, qu'il seroit mal aisé de le faire; mais qu'il pouuoit dire pour le passé n'en auoir seellé sans auoir esté deliberées, & rapportées en plein Cōseil, par l'vn des maistres des Requestes, n'en ayant iamais esté vsé si sobrement que depuis 4. ou 5. ans. Et pour les cassations des Arrests du Parlemēt, ç'a esté quant il a entrepris de iuger par dessus les deffēces du Cōseil du Roy: qui n'a tenu tels iugemens pour arrests; que leurs Arrests n'auoiēt iamais esté plus soigneusemēt gardés qu'ils l'auoiēt esté depuis peu d'années: que l'on auoit fait cesser le Cōseil pour trauailler sans intermissiō aux Cahyers des Estats; & qu'estāt à present sur celuy de la Iustice, sa M. auoit commandé d'en prendre leur advis, qu'ils ne gardoient pas les Ordonnances, sur la reception de ceux de leur Cōpagnie, receuāt plusieurs freres, & proches parés dās vn mesme Parlemēt: moins celles de moulins, confirmée à blois, pour les procez des Cōmissaires, qui ne les permet qu'en cinq cas, qui sont iournellemēt surpassez; qu'il y auoit des Requestes presentées au Cōseil du Roy pour en casser les Arrests; ce que toutesfois on n'a encore fait: que d'ailleurs ils euoquent les procez des Subalternes, mesmes les decrets, & les iugent en premier instāt au preiudice des Iuges ordinaires: qu'ils cassent les Arrests du Cōseil du Roy, encores qu'ils portent ces mots, *Le Roy en son Conseil*, & déchargēt les parties d'y cōpa-

roit: qu'on ne pouuoit, & ne deuoit-on se plaindre de la regēce de la royne, ayāt esté si heureuse, que iamais les historiens n'en ont remarqué de si fauorable, où toute la France a iouy si abondāment de toutes sortes de biēs: Que la royne ne doit cōpte qu'à Dieu seul de sa regēce: & quant elle voudroit le rēdre au Roy, sa M. luy en sçaura gré: que persōne ne pouuoit prescrire au Roy quel Cōseil il doit prēdre, qu'il auoit trouué bō se seruir des mesmes personnes, que le feu Roy auoit choisies, dōt il s'estoit biē trouué: que sa M. feroit voir en sō Cōseil les Remonstr. & y feroit répondre. Et cōme la Cōpagnie se retiroit, M. le Presid. Ieanin prist la parole, & dit, qu'ayāt innocēment manié les fināces du Roy, avec ceux qui s'en sont meslez, il pēseroit encourir blasme, s'il ne disoit quelque chose de sa charge, de laquelle il répōdroit deuant les plus seueres luges, & qu'il s'ētōnoit cōment il estoit blâmé, nō par vne populace, qui interprete legeremēt les actions d'autrui, mais par vne Cōpagnie de gēs sages, malicieusemēt informée de l'administratiō des fināces du roy: que ce n'étoit point à la roine à qui on s'adressoit, mais à luy: que sa Maiesté n'estoit tenu rēdre cōpte de sa Regence qu'au Roy, lequel quāt il sera en âge de l'écouter, s'il en veut prēdre la peine, luy en rēdra mille graces du soin qu'elle y a apporté: & pour venir au particulier, & apres que le feu Roy nous fut rāui. M. de Sully cōtinua le maniemēt des fināces, iusques à la guerre de Iulliers; en arresta luy-mesme la dépense, ne laissant lors de deniers cōptans es mains du Tresorier de l'epargne Puget, que trois milliōs cinq cens mille liures, qui furent baillées au sieur de Beaumarchais: de dire que le reuenu du Roy soit augmēté depuis le decez du

feu Roy, on ne le ſçauroit dire, puis qu'au cōtraire il y a eu rabais ſur les Gabelles, de deux milliōs de liures, & les charges augmētées de quatre mille pour la neceſſité des affaires: Quāt aux deniers de la Baſtile, quelques neceſſitez que l'Eſtat ait pâti, on n'y a point touché, ſinō pour arrêter le cours des mouuemēs derniers, & pour le voyage de Poitiers: & ſur ce qu'ō a dit qu'ō mettoit du tēps du feu Roy tous les ans 2. millions de liures dās la Baſtile, que cela n'eſtoit point, qu'on n'y mettoit que 8. cens mille liures; qu'il eſtoit fort perilleux de toucher au mal ſās y apporter le remede, qu'il falloit nōmer & particulariſer ceux qui en eſtoiēt cauſe, qui ſerōt incōtinēt abādonnez des gēs de biē, & que luy-mefme ſeroit le premier à le faire, & qu'à la verité il ſeroit expediēt de retrācher & les dépēſes & charges ſuruenues: que ſō deuoir l'obligeoit de dire cela. Et ayāt fini, M. de Guyſe, qui auoit chāgé de place quelque temps auparauāt, quittāt le coſté de la Royne, s'approcha près de M. le Chācelier du coſté du Roy; & en ſe baiſſant iuſques à l'oreille du Roy, dit en paroles baſſes, qu'il parloit pour les princes & pairs; qu'ils ne viendroiēt au Parlement, ſi le Roy ne leur cōmandoit expreſſēmēt, pour cōſeruer ſon autorité: que pour luy, il le ſeruira lēs yeux bandez enuers tous & cōtre tous, luy offrāt ſa vie, ſes biens, & ſon épée: Et en ſemblables termes en dirēt de meſme M^{rs}. de Vēdoſme & de Mont-morācy: M. d'efpernon dit, qu'il ne croyoit que le Parlement euſt la puisſāce d'appeller & aſſembler les Pairs de France, ſans permiſſion du Roy; qu'il ſe garderoit bien de l'aller inſtruire des affaires d'Eſtat: qu'il y auoit difference du Parlement, cōme il eſt à preſent, d'avec ce qu'il eſtoit en ſa premiere inſtitutiō, d'autāt

que lors il n'y auoit que les Princes, Ducs, & Pairs qui rendoient la Iustice, par cōmandemēt du Roy: & qu'il auoit l'honneur d'y seoir, & faire partie du corps: A quoy M. le premier Presidēt repliqua, que l'arrest estoit sous le bō plaisir du Roy: il repart, & dit, que l'arrest n'estoit ainsi du commencement, & qu'on sçauoit tout: & sur la repliche la Roynes interposa son autorité, & dit, que c'estoit assez, fermāt par ces paroles à l'un & à l'autre la bouche. Ce discours finy, le M. d'Ancre se leuant de dessus son tabouret, s'aprocha de l'oreille de la Roynes, & luy parla tout bas: luy retourné en sa place, la Roynes s'adressant au Parlemēt, dit, Vous souffrez faire & vendre ces libelles diffamatoires cōtre l'hōneur du Roy & le mien, & n'en faites iustice, tenez, voyez ce liuret, elle le bailla au sieur de Pisieux, Secretaire d'Estat, qui en leut quelques fueillets marquez, puis s'arresta: ledit sieur premier President luy dit, qu'il y atoit trois iours qu'il en faisoit faire vne exacte perquisition sur les Imprimeries, & qu'il n'auoit encores sçeu rien decouurir: M. d'Espernon dit, que ce n'estoit ces pauures gens là qu'il falloit punir, lesquels ne cherchent qu'à gagner leur vie, mais le. Autheurs: Et ayant fait appeller les Gents du Roy, la Roynes leur fit bailler le liure: Et cōme la compagnie se vouloit retirer, M. de Neuers, qui n'auoit point encore parlé, dit à la Roynes, qu'il n'auoit baillé procuration à persōne pour parler pour luy, & qu'il sçauoit bien ce qu'il deuoit au Roy, & qu'il ne pensoit pas que ce fust vne assemblée pour renoueller le sermēt de fidelité, qu'il trouueroit beaucoup de bōnes choses dans les remōstrances, & que s'il y auoit quelque chose de mauuais, s'estoit au Roy à le rejeter.